

**Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaata allanngortinneqarnera pillugu Inatsisartut inatsisaat nr. 10, 8. juni 2014-imeersaq (Avaleraasartuunut akitsuut) Atuussimasoq (Historisk)**

**§ 1**

Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaanni nr. 11, 3. december 2012-imeersumi, Inatsisartut inatsisaatigut nr. 9, 29. November 2013-imeersukkut allanngortinneqartumi makku allannguutigitinneqarput:

**1.** Inatsisip taaguutaa ima oqaasertaqassaaq:

”Qalerallit avaleraasartuullu avataasiorluni aalisarnermi pisarineqartut akitsuutaat pillugit Inatsisartut inatsisaat.”

**2.** § 1, *imm. 1*, ima oqaasertaqassaaq:

”Suliffeqarfiit aamma inuit avataasiorluni qaleralinniarnissamut taamatullu aamma avaleraasartoorarnissamut pisassinneqarsimasut pisamik ilaasa, aalisarneq pillugu inatsit naapertorlugu Kalaallit Nunaanni tunitsivimmuut tunisassiorfimmulluunniit tunineqartussaannngitsut landskarsimut akitsuutaannik, inatsimmi matumani aalajangersakkat naapertorlugit akiliissapput.”

**3.** § 2-p kingornagut qulequtaq ima oqaasertaqassaaq:

*”Qalerallit akitsuutaat”*

**4.** § 3, *imm. 1*, ima oqaasertaqassaaq:

”Akitsuut qaleralimmuut kiilumut 2,50 koruuniuvoq, takuulli *imm. 2*.”

**5.** § 3, *imm. 2, punktum siulleeq*, ima oqaasertaqassaaq:

”Akitsuut qaleralimmuut kvartalikkaartumik aaqqiivigineqartassaaq kvartalip siuliani akitsuutip angissusia tunngavigalugu aammalu qalerallit akiisa uuliap danskit koruuninngorlugit akianut sanilliullutik allanngorarnerisa angeqqataannik.”

**6.** § 3-p kingornagut qulequtaq nutaaq ilanngunneqassaaq:

*”Avaleraasartuut akitsuutaat”*

**7.** Qulequttap nutaap kingornagut ilanngunneqassaaq:

”§ **3a.** Akitsuut avaleraasartuumut, angallat Kalaallit Nunaanni angerlarsimaffeqartutut nalunaarsorneqarsimasoq atorlugu pisarineqartumut kiilumut 0,95 koruuniuvoq.

*Imm. 2.* Akitsuut avaleraasartuumut, angallat Danmarkimi, Savalimmiumi nunaniluunniit allani angerlarsimaffeqartutut nalunaarsorneqarsimasoq atorlugu pisarineqartumut kiilumut 0,95 koruuniuvoq.”

8.§ 7 ima oqaasertaqassaaq:

”§ 7. Naalakkersuisut qalerallit akitsuutaannik akiliinnginnissamik qinnuteqaat akuerisinnaavaat, misileraalluni aalisarnissaq peqassutsimut imaluunniit inuussutissarsiornermut pingaaruteqartoq akuersissutigineqarsimappat, aammalu akiliinnginnissamik akuersinerup aningaasatigut sunniutissai annertunngippata.”

## § 2

Inatsit 1. maj 2014-imi atortuulissaaq, atuutissallunilu avaleraasartuunut 1. maj 2014-imi kingusinerusumiluunniit pisarineqartunut. 2014-imi aningaasanut inatsimmi kontumut pingaarnermut 24.11.26-mut oqaasertaliunneqartumi nr. 1-imi aalajangersagaq taassuma ilutigisaanik atorunnaarsinneqassaaq.

*Namminersorlutik Oqartussat, ulloq 8. juni 2014*

Aleqa Hammond